

玉函山房輯佚書

目耕帖卷五

歷城馬國翰竹吾甫

易五

漢書五行志劉向引易巽爲風爲木卦在三月四月
繼陽而次主木之華實風氣盛至秋冬木復華故
有華孽案劉子政引易說災異殆用孟京之說也
徐郎新義重巽以申命下有命乃行也一句誤寫入
注案王注命乃行也未有不巽而命行也文何相
承確是注語未可羼入經文

程沙隨古占法迥初寓餘姚僧舍筮之遇巽占曰有風火之恐而不及害未幾舍北火發十餘室至窯舍止縣取綱維與遺火僧杖之其占曰巽爲風互體離離爲火兌爲毀折變震爲驚懼初六爲內卦之主不與離應故曰不及害巽爲寡髮重巽二僧之象反對重兌兌爲決二僧受杖之象占之奇驗如此可等繹而得漢師占法矣

胡炳文周易本義通釋剝牀是以陰剝陽使陽不能安也巽在牀下是以陽處陰陽不能自安也又云

旅上九巽上九皆以剛居柔彼得其資斧旅貲於用柔也此喪其資斧巽戒其過柔分析處得經之心

漢書五行志動靜應誼說以犯難如此則金得其性矣師古曰言以和悅使人雖犯危難不顧其生也易兌卦彖曰說以犯難人忘其死故引之也唐避太宗諱故民作人案以兌彖說金之性兌爲西方金也

瞿鈞云民忘其勢者以佚道使民也民忘其死者以

生道殺民也

李厚菴周易通論來兌者我感而物來引兌者物引
而我去記云物至而人化物孟子曰物交物則引
之而已矣此之謂也翰案和兌孚兌君子之朋也
來兌引兌小人之黨也商兌未寧君子升也介疾
有喜小人去也孚于剝有厲者信于君子則有慶
信于小人則未光治亂之機操自九五也

郭京舉正災之繇利涉大川有利貞字而彖辭無文
則增入斷之繇女歸吉下無也字而彖辭有之則

削去吳公武取以爲說翰案易纂言云利貞不待
釋恩以漸之進也女歸吉也正如孟子引孔子說
詩云夫有物必有則民之乘夷也故好是懿德只
加數虛字而辭義皆通此豈可輕議增削乎玩易
意見又以利涉大川下利貞二字疑衍案利涉大
川卦本有舟楫之象利貞主四五兩爻亦是二義
則謂衍者亦非也

李舜臣周易本傳萃因民之聚立廟以堅其歸向之
心所以爲懷保之道渙憂民之散立廟以收拾其

薄析之心所以爲招撫之術皆所以統攝民心而
堅凝之也具有經濟非僅訓義圓湛也

渙六二渙奔其机机與几通左傳設机而不倚家語
仰視棲桷俯察机筵大戴禮於机爲銘焉皆以几
爲机與山海經單狐之山多机木郭璞注狀加榆
可燒以糞田者不同何楷訂詁茲欲渙散險難必
自其机奔出而亟去之然後悔可亡引左傳晉公
子去齊爲證視舊說奔就其机義深而得爻意
呂氏春秋召類篇引易曰渙其羣元吉渙者賢也羣

者衆也元者吉之始也渙其羣元吉者其佐多賢
也呂氏賓客去古未遠或及聞商瞿橋底授受之
遺說歟錢氏大昕潛研堂集引之以爲孔子云寬
則得衆又曰羣而不黨孟子云得道者多助白虎
通曰君之爲言羣也六四居大臣之位以進賢爲
己任旁求俊父聚之於朝所謂其心休休如有容
者故有元吉之占又謂伊川言君臣同功所以濟
渙天下渙散而能使之羣聚可謂大善之吉與呂
覽義亦相近蘇氏云聖人之所欲渙以混一天下

者也未合易旨

漢書劉向傳引易曰渙汗其大號言號令如汗汗出而不反者也出善令未能踰時而反是反汗也北堂書鈔引王肅易注王者出令不可復反喻如身中汗出不可反也與劉說合劉勰文心雕龍其出如綽不反若汗亦用漢書義也

吳曰慎云天地之化刻刻相節時時相革革則日新節則不忒故曰天地革而四時成天地節而四時

成

節初九不出戶庭本義謂戶外之庭九二不出門庭
本義謂門內之庭王恕玩易意見以爲戶庭門庭
一也无所分別門庭爲門內之庭可說戶庭爲戶
外之庭不可說戶外豈有庭乎案古居室堂內爲
室室西南隅爲奧室東南啓一扉以出曰戶戶外
曰堂堂下階前相直曰庭外闔雙扉爲門戶爲內
室之戶故詩曰西南其戶又曰塞向墐戶門則外
門也煞有分別何得憑臆而以戶外之庭爲不可
說乎

時不可爲雖不出戶庭而无咎時有可爲則不出門
庭而有凶孟子論禹稷顏子正合此二爻之義

周世樟云節以甘爲正不能爲甘節則寧爲苦節而
而毋至於不節此卽禮奢寧儉意翰案左傳成十
五年曹子臧引前志曰聖達節次守節下失節愚
以爲安節者聖之達節安而行之者也甘節者次
之守節利而行之者也苦節者未能達節而志在
守節復恐失節勉強而行之者也易曰苦節不可
貞上六曰苦節貞凶悔亡恐其終於无節也鄭志

士也非刺夫行讎者也

陸希聲傳中孚柔在內而剛在外有鳥鵠實之象今
變爲小過則剛在內而柔在外有飛鳥之象鄭東
卿易卦疑難圖小過有飛鳥之象中孚有卵之象
孚字从爪从子如鳥以爪抱卵也又卦畫二陰居
內外實中虛亦卵之象也李簡學易記取之案卦
中如鳴鶴如翰音多鳥象正合卦義

中孚豚魚吉王弼注魚者蟲之隱也豚者獸之微賤
者也作二物解鄭康成注三辰在亥亥爲豕爻失

正故變而從小畜豚耳四辰在丑丑爲鼈鼈蟹屬
魚之微者值天淵二五皆坎爻坎爲水二灌澤則
豚利六五以水灌淵則魚利豚魚以喻小民也而
爲明君賢臣恩意所供養故吉訓義曲折其取象
難曉亦以豚魚作二物解釋文引黃頸豚作遯蓋
三家本有作遯魚者故黃依用遯魚不知作何解
意其訓潛魚乎此則作一物解矣羅願爾雅翼鯀
今之河豚每三頭相從爲一部諺云得一部典一
袞冬至日輒至應中孚十一月卦信及豚魚卽河

此三種魚說義乃賅備高適送柴司戶充劉卿判官之嶺外詩忠信涉波濤卽信及豚魚之義也漢書魯恭傳引易十一月君子以議獄緩死案孟喜卦氣圖以中孚爲十一月辟卦此引用孟氏說也郭京舉正中孚彖豚魚吉信及也今本及字下多豚魚二字案及是因此至彼之辭信及豚魚則大於豚魚者可知若及下去豚魚二字便不可通

徐幾易解象言刑獄者五噬嗑賁豐旅中孚也離爲戈兵有刑獄象又取離明照知情實刑不濫也噬

噬豐兼取震賓旅兼取艮者明以察其情動以致其伏噬噬去間豐則多故非震以動之无以威重也貴過於文旅不留獄非艮以止之或輕於用刑也蓋獄乃人命所繫一成不可變明貴无時不然威則有時而當止至於中孚則全體似離互體有震艮而又兌以說之巽以緩之聖人卽象垂教其忠厚惻怛之意見於謹刑如此何其仁哉

淮南子泰族訓寒暑燥溼以類相從聲響疾徐以音相應也故易曰鳴鶴在陰其子和之此以同類感

應立論爲義甚古則好爵爾靡亦不當作係戀解
楊慎丹鉛總錄吾與爾靡之靡音磨叶其子和之
相觀而善謂之摩鶴鳴以相和成音好爵以相磨
成德子夏之易說也案京房本靡作廟與此合較
古本一作糜者與上義貫錢國瑞云靡如從風而
靡之靡五入人如風故稱靡鶴子鳴和爾我隨風
一體上巽相隨順入於五中說之至更入之深其
說亦好若孔德璋北山移文雖假容於江皋乃纓
情於好爵則似以懷祿爲刺非易意也

張栻南軒易說易言月幾望者三皆言分不可踰也
歸妹之六五曰帝乙歸妹其君之袂不如其娣之
袂良月幾望中孚之六四曰月幾望焉匹亡无咎
蓋歸妹以帝女下嫁則易以亢滿何以執婦道成
肅雌之德哉中孚之時君臣推誠以相與則君必
降己以下臣臣以見知而上進上下本不相疑而
僭迫之端易啓也故皆戒之以月幾望春秋書日
蝕三十六月蝕則未嘗書蓋日蝕者變之大月蝕
者乃其常也君道不可以虧臣道不可以盈也

侯行果說中孚上九云窮上失位信不由中以此申命有聲無實中實內喪虛華外揚是翰音登天也翰案鳴鶴在陰貢禹之彈冠也翰音登天王衍之清談也

郭京舉正小過彖柔得中是以可小事也今本脫可字而事下誤增吉字案此泥視下是以不可大事也句有不可因謂上句當有可字既加可字必宜去吉字方成文理因而臆說以爲經談也

陸佃埤雅釋鳥引說文鷩从卉从干上爲逝鳥飛戾

天故詣剪也引易曰飛鳥遺之音不宜上宜下大
吉上逆而下順也頗得古象案唐書歷志大衍步
發斂術載孟喜六十四卦用事配七十二候圖大
寒十二月終卦及立春正月節始卦外內皆候卦
小過又夏小正十有二月鳴弋戴德傳弋禽注金
履祥注弋當作鳶孔氏廣森補注篆文鳶雖非從
弋但此經已經隸寫或又轉誤而脫其半任氏兆
麟本作鳴鶯注云說文作鳶蓋禽鳥得氣之先鳴
於十二月感春至也故曰飛鳥遺之音出前言之

應征鳥厲疾之候寒鳴嚇雛不仁也故不宜上而
逆由後言之得雷氣爲驚蟄鷹化爲鳩鳶亦與其
魄飛鳴翔乘春之和故宜下而順也

關明易傳小過一時之用也大過一世之用也翰案
大過象曰君子以獨立不懼遯世无悶此志節之
不可變者也小過象曰君子以行過乎恭喪過乎
哀用過乎儉此權宜之不可常者也晁說之云有
舉趾高之莫敖而正考父循牆有短喪之宰我而
高柴泣血有三歸反坫之管仲而晏子敝裘雖非

中行亦足以矯時彌俗最得象義

郭京舉正小過上六象曰密雲不雨已止也注陽已
止下故也今本正文作已上故注亦誤作陽已上
故止也案上謂上六郭說非也

郭子章螭衣生易解自序孔子之可仕可止學良可
久可速學咸恒不厭不倦學乾多識多聞學大畜
寧儉寧戚學小過故易惟孔子能學也

王寅周易自得縕坎離居上經之終以救大過之偏
聖人所以明天道之純也旣濟未濟居下經之終

以救小過之偏聖人所以明天道之合也易之爲書救天下以寡過而其用則總在於坎離孔子曰不得中行而與之必也狂狷乎獨立不懼逝世无悶狂者之氣槩也行過乎恭喪過乎哀用過乎儉狷者之規模也兩過皆坎象頤中孚有離象變大過之三四則上下皆坎變小過之初則上下皆離剛變爲柔洪範之所謂柔克也柔變爲剛洪範之所謂剛克也故曰狂狷可以至於中行

周櫟闡書影旣濟未濟以坎離合而成卦然坎上離

下爲旣濟而中互未濟離上坎下爲未濟而中互旣濟蓋水上火下不能有生物之功矣而中接以木則水將上行而火亦下降水上火下可以有成物之用矣而非中隔以金則火將上行而水亦下注是旣濟之可不至於未濟而未濟之終可以爲旣濟者金木之爲用不小也

郭京舉正旣濟彖旣濟亨小小者亨也今本脫一小字本義亦謂疑脫小字案小者亨也已釋卦小字之義非脫文

李厚菴云君子行道濟時義不可則不進無異於以
其輪禮不備則不合無異於喪其弗

乾鑿度既濟九三得正下陰能終其道濟成萬物猶
殷道中衰王道陵遲至高宗內理其國以得民心
扶救衰微征伐遠方三年而醜惡消王道成殷人
高而宗之文王採以較易勸德也漢書淮南王列
傳諫伐閩越書引易高宗伐鬼方三年而克之言
用心之不可不重也深得象傳憲字之義陳際泰
易經大義高宗伐鬼方既濟乘富強之餘故憂其

憲未濟憤陵夷之積故慶其賞說義亦精

禮記坊記子云敬則用祭器故君子不以非廢禮不以美沒禮故食禮主人親饋則客祭主人不親饋則客不祭故君子苟無禮雖美不食焉易曰東鄰殺牛不如西鄰之禴祭實受其福鄭注旣濟離下坎上離爲牛坎爲豕西鄰禴祭則用豕與言殺牛而凶不如殺豕受福喻奢而慢不如儉而敬也正義引鄭注易九五曰互體爲坎也又互體爲離離爲日坎爲月日出東方東鄰象也月出西方西鄰

象也此注坎爲豕西鄰禴祭則用豕與此文異案
鄭之注易詳言東鄰西鄰注禮詳言禴祭總以九
五一爻有坎有離易注舉互禮注言上下二注兩
通非文異也說苑引易不如西鄰之禴祭云蓋重
禮不貴牲也敬質而不貴華誠有其德而推之安
往而不可是以聖人見人之文必坎其質亦以用
牲爲言又漢書郊祀志杜郭引易東鄰殺牛不如
西鄰之禴祭言奉天之道貴以誠質大得民心也
師古曰禴祭謂禴煮新菜以祭言祭祀之道莫成

於修德故紂之牛牲不如文王之蘋藻也此與王
注論祭之薄者義合論訓煮新菜取淪之義與鄭
氏不同

朱震漢上易傳引孟喜曰坎爲狐坎穴也狐穴居案
六五自三至五互象坎非下卦正象之坎故謂小
狐

史記春申君列傳引易曰狐涉水濡其尾此言始之
易終之難也韓詩外傳官忘於有成病加於小愈
禍生於懈忘孝衰於妻子察此四者慎終如始易

日小狐汔濟濡其尾精譜皆注疏之所不逮史記
引作狐涉水者戰國說士撮其義而言之也

震用代鬼方王應麟困學記聞郭璞以震爲摯伯之
名蓋謂高宗伐鬼方時命摯伯爲將帥也指實言
之必有所據惜古書散佚難考耳

未濟上九飲酒无咎濡其首有孚惠心蒸溥蒙引是
孚重易六十四卦三百八十四爻聖人不過教人
不失其是而已

胡炳文通釋象於既濟之二曰中離之中也未濟之

二曰中坎之中也旣濟之五曰時時中也未濟之上曰不知節不知隨時以取中也堯授舜不過一
中易三百八十四爻只是一時故於小象之末特
曰中曰時曰節而易之大義略可觀矣

繫辭分章諸家多不同上繫十二章正義引周氏云
天尊地卑爲第一章聖人設卦爲第二章彖者言
乎象者爲第三章精氣爲物爲第四章顯諸仁藏
諸用爲第五章聖人有以見天下之赜爲第六章
初六藉用白茅爲第七章大衍之數五十爲第八

章子曰知變化之道爲第九章天一地二爲第十
章是故易有太極爲第十一章子曰書不盡言爲
第十二章馬季長荀爽姚信又分自蒙章後取負
且乘致寇至更爲別章成十三章下繫引周氏莊
氏並爲九章第一起八卦成列至非曰義第二起
古者包犧至蓋取諸夬第三起易者象也至德之
盛第四起困于石至勿恒凶第五起乾坤其易之
門至失得之報第六起易之興至巽以行權第七
起易之爲書至思過半矣第八起二與四至易之

道也第九起夫乾天下之至健也至其辭屈正義
從之韓流澗泉日記王昭素謂易與天地準合精
氣爲物爲一章至君子之道鮮矣胡翼之則至鼓
萬物而不與聖人同憂鬼以道斷一陰一陽之謂
道至君子之道鮮矣皆與今本異

湛若水修復古易經訓謂舊本多有錯簡重複如亢
龍有悔以下十九條乃文言之文而錯簡散佚於
繫辭吳澄易纂言以繫辭傳引易一十八節並移
入文言傳近見洛川賈構著繫辭本解凡語似文

言者出之鍾吳氏而尤甚雖發理均有可觀而汨亂古經未免率臆之失矣

禮記樂記天尊地卑君臣定矣卑高已陳貴賤位矣動靜有常小大殊矣方以類聚物以羣分則性命不同矣在天成象在地成形如此則禮者天地之別也此用易繫辭傳語而文句有異鄭元注卑高謂山澤也位矣尊卑之位象山澤也動靜陰陽用事大小萬物也大者常存小者隨陽出入方謂行蟲也物謂殖生者也性之言生也命生之長短也

象光耀也形體貌也正義引鄭注周易云君臣尊
卑之貴賤如山澤之有高卑也動靜雷風也類聚
羣分謂水火也成象謂日月星辰也成形謂草木
鳥獸也其注易動靜云雷風注禮云陰陽用事義
得會通注易類聚羣分謂水火而注禮云方謂行
蟲物謂殖生二注不同正義云類聚稱方者行蟲
有性識道理故稱方也羣分稱物者謂殖生無心
靈但一物而已故云物也案鄭意以樂記言則性
命不同矣與易吉凶生矣句異故如此解楊慎丹

鉛錄行蟲之名不見於訓詁但字書有解穀蟲名
虸蚄見齊民要術又張有復古編虸蚄古只作子
方是方爲行蟲之原也鄭之解方爲行蟲蓋緣字
之音生義頗亦僻左何氏訂詁案鄭以行蟲解方
蓋緣類聚二字推測之耳楊取虸蚄蟲名證鄭則
貞所謂僻左者也

五經通義冬至陽動於下推陰而上之故大寒於上
夏至陰動於下推陽而上之故大熱於上故易云
日月逆行一寒一暑

韓詩外傳引易曰易簡而天下之理得矣忠易爲禮誠易爲辭賢人易爲民工巧易爲材說義質實正義不引此而引列子及老莊語殊失體要

釋文繫辭焉而明吉凶虞本更有悔吝二字又云剛柔者晝夜之象虞作晝夜者剛柔之象案虞治孟氏易本用孟氏漢志所謂三家經也繫辭傳吉凶者失得之象也悔吝者憂虞之象也悔吝與吉凶對舉知今本無悔吝二字脫文也變化者進退之象也剛柔者晝夜之象也承上剛柔相推而生變

化言之作晝夜者剛柔之象文法錯綜且於相推二字有發揮亦較今本爲勝

六爻之動虞翻云陰陽失位則變得位則否故以陰居陽位陽居陰位則動林至易裨傳取其說

張南軒易說易三百八十四爻憂悔吝而存乎介者多矣唯豫之六二介于石不終日貞吉在豫之時能介而自守者乎震无咎而存乎悔者多矣唯復之初九不遠復无祇悔元吉在復之初能悔而改過者乎

震无咎王肅云震動也韓康伯注同馬季長云驚也
鄭康成云懼也皆訓如字周宏正云救也則震作
振字解矣

彌綸釋文京云彌遍綸知也王肅云綸纏裹也荀云
彌終也綸迹也正義彌謂彌縫補合綸謂經綸率
引吳氏纂言彌如開弓愈開愈滿綸如合繩漸合
漸大皆充廣之意義尤精核

精氣爲物游魂爲變是故知鬼神之情狀鄭康成云
精氣謂七八也游魂謂九六也七入木火之數九

六金水之數木火用事而物生故曰精氣爲物金
水用事而物變故曰游魂爲變精氣謂之神游魂
謂之鬼翰案京房易傳稱孔子云有四易一世二
世爲地易三世四世爲人易五世六世爲天易游
魂歸魂爲鬼易鄭氏光明京房學後治費氏古文
此亦京氏遺法也視諸家泛以幽明入鬼立義者
爲得贊易之旨

釋文相盈引桓云動也而知引荀爽荀柔之明僧紹
音智議之引陸姚桓无荀柔之作儀之於劫引荀

柔之云別也聖人之道引明僧紹作君子之道曰
人引王肅卞伯玉桓元明僧紹作仁案桓元卞伯
玉苟柔之明僧紹並注繫辭今皆佚見徵引者唯
此

魯邦彥圖書就正錄太極不可見圖兩儀以見太極
王道行序取之以爲深得古人之意案太極已是
從乾坤兩卦推上一層宋儒謂無極而太極推入
虛無過高之弊也

胡居仁居業錄一名生兩只是陰陽兩端交錯變化

自然之妙老氏一生二二生三是何道理陰陽兩端再變得甚物來作三故太極生兩儀兩儀生四象四象生八卦八卦生十六十六生三十二三十二生六十四卦加一倍是邵子之數愚以爲陰陽上各生陰陽奇偶上各生奇偶此易之理易之理不出於陰陽兩端變化錯綜生出六十四卦若再錯綜疊上去生得無窮卦出來然只是六十四卦足以該盡事理再疊反過乎煩故卦止六十四亦自然之理也若天地生物只是陰陽交變錯綜生

千生萬無窮無盡又不可限以數目故曰一陰一陽之謂道劉向說苑引一陰一陽之謂道云道也者物之動莫不由道也故發於一成於二備於三周於四行於五案一爲太極二爲兩儀三爲三才四爲四時五爲五行也

繼之者善也成之者性也孟子道性善實原於此蘇子瞻云善者道之繼而指以爲道則不可今不識其人而識其子因之以見其人則可以爲其人則不可故曰繼之者善也學道而自其繼者始則道

不全昔者孟子以善爲性以爲至矣讀易而後知其非也孟子之於性蓋見其繼者而已夫善性之效也孟子不及見性而見夫性之效因以所見者爲性性之於善猶火之能熟物也吾未嘗見火而指天下之熟物以爲火可乎夫熟物則火之效也朱子亦云孔子說得細膩孟子說得疎略蓋不曾推原源頭上面一截耳陳淳北溪字義此夫子所謂善是就人物未生之前造化源頭處說善乃重字爲實物若孟子所謂性善則是就成之者性處

說是人生以後事善乃輕字言此性之純粹至善耳其實由造化源頭處有是繼之者善然後成之者性時方能如是之善則孟子之所謂善實淵源於夫子子所謂善者而來而非有二本也紗案蘇氏不及見性反謂孟子不及見性其失固無待辨朱子之說陳氏已暗破之但字分輕重看善不一亦非也愚以爲一陰一陽之道卽所謂立天之道曰陰與陽也此指天道以陰陽賦畀於人者而言繼善成性謂人秉彝於天有此善曰繼曰成謂人

繼之成之也中庸天命之謂性率性之謂道正從此出孟子以性爲善而曰非天之降才爾殊也豈弗推原源頭上面一截乎

漢書王莽傳引易繫辭坤動動靜辟脅萬物生焉頤師古云辟音闢開也脅收斂也易上繫之辭曰夫坤其靜也翕其動也闢是以廣生焉又云翕脅聲之近案此引易與今易不同蓋亦衡咸所傳梁邱易本也

言行君子之樞機鄭康成注樞戶樞也機弩牙也戶

樞之發或明或闇弩牙之發或中或否以誓言語
之發有榮有辱正義訓樞機從鄭義

大戴禮記衛將軍文子篇學以深厲以斷送迎必徵
上交下交銀手如斷是卜商之行也盧辨注銀廉
銕也如斷言便能孔氏廣補銀猶斷斷也如斷有
限制又云平宋本訛手文鎧嚴吹傭錄銀手如斷
卽斷金也

大衍之數自漢至宋以來爲說不同而諸家揲筮法
亦不一京房每爻三十策唐大衍歷用之馬融以

太極爲北辰居位不動其餘四十九轉運而用也
荀爽云卦各有六爻六八四十八加乾坤二用凡
五十乾初九潛龍勿用故用四十九也鄭康成云
天地之數五十有五以五行氣通凡五行減五大
衍又減一故四十九也姚信董遇云天地之數五十
有五者其六以象六畫之數故減之而用四十九
虞翻謂奇所掛一策劫所擗之餘又云四十有九
者策數四十九王弼云衍天地之數所賴者五十
也其四十有九則其一不用韓康伯注取其說

顧憲亦主王氏云立此五十數以數神神雖非數
因數而顯故虛其一數以明不可言之義孔頤達
因虞說以三多三少兩少一多兩多一少餘策定
陰陽老少畢中和揲法朱子稱其視疏義爲詳其
論三揲皆掛一正合四營之教惟以三揲之掛揲
分措於三指間爲小誤張蠷作周易啓元其筮法
初揲掛一次兩揲皆掛左手不揲右手趙汝楨筮
宗駁之程迥周易古占取其老陽變成少陰老陰
變成少陽謂與國語筮得秦之八合莊紹取其法

爲揲蓍新詣伊川法與橫渠同亦四十九蓍初變掛一以象人後二變蒙上不復掛朱子作著卦考誤辨之以爲若後兩變不掛則老陽少陰皆二十七少陰九老陽一而已深有害於成卦變爻之法鄭兼山申程法以爲此閏數當期之外者也張元理從張載莊紹二家爲餘二承六之說黃氏宗羲作象數論糾之去揲四之外方爲殘奇五策六策上有一揲豈可遷就以合左乎暨南禹占法云六爻變占之卦大象六爻不變占卦大象若彖辭則

專以待卜天子諸侯有大事則簪人先筮得其卦
書於板以授太卜太卜以墨畫所得之卦於龜腹
春灼後左夏灼前左秋灼前右冬灼後右其文入
於卦墨謂之食則決於彖象與爻各自爲書其說
甚異邵子云蓍之用數掛一以象三其餘四十八
則一卦之策也四十其十七爲四十八也蔡元定云
按五十之蓍分二掛一揲四爲奇者三爲偶者二
丁易東作稽衍序意云朱子以五乘十之說於諸
家爲近至於四十有九率不過歸於虛一而已未

有得失五十數與四十九之全者於是萃五十七
家之說爲稽衍而自爲原衍翼衍凡三卷大旨謂
一居中則五退位宗太極也掛一分二揲四皆自
然妙合以百計之自然虛一非置一策不用如今
筮法也在四十九中則又含一蓋十二個四餘也
說亦出於河洛之學最爲近理云

釋文洗心京苟虞董張蜀才作先心石經同案先心
蓋謂以心先天下也與乾文言先天同義洗心者
王弼所改

白虎通引易曰懸象著明莫大乎日月苟悅漢紀引
易備物致用立象成器縣作懸立下有象字莫大
乎蓍龜陸德明本大作善東坡易傳天地四時日
月天事也天事所不及富貴者制之富貴所不制
聖人通之聖人所不通蓍龜決之

唐李華作卜論略云觀大誥言寧王遺我太寶龜則
一龜世世以遺子孫何如其重也聖人好生之德
洽于人心庸忍殺至靈之物乎神靈出于江水中
廬江郡歲時貢生龜長尺二諸侯之國猶有守龜

大夫之家亦或居繁未間其以死龜卜也推詳引
論以爲卜用生龜明季本作卜筮論主其說以史
記兩傳首引宋元王事爲徵注周禮誤信以爲然
至今以夢傳妄又引詩爰契我龜云炮契也藝荆
吹犧成之以蒸其氣也引書唯洛食云食與餉同
謂可拂拭而去之有似於餉又引周禮龜人禮記
月令舉龜謂數其藏龜之物與其居龜之室說極
新異古法失傳存一說可也

歐陽修撰易童子問以河圖洛書爲怪妄蘇東坡云

著於易見於論語不可證也曾南豐云以非所習
見則果於以爲不然天地萬物之變爲可盡於
耳目之所及亦可謂過王伯厚困學紀聞載此條
云蘇曾皆歐陽公門人而議論不苟同如此翰案
永叔之論誠過然其過未爲無因蓋見當時言河
洛者支離荒怪遂矯激而爲此言爾近得吾同門
友章邱劉左青家龍所著讀書疑甲編載一條云
往象莫大乎天地君臣之象也故曰崇高莫大乎
富貴君治萬民如太極生八卦故曰天生神物聖

人則之也神物卽太極也故結之曰四象所以示
也變通莫大乎四時如聖人之立成器以利天下
也故曰天地變化聖人效之而結之曰繫辭所以
告也著明莫大乎日月如蓍龜之告吉凶故曰天
垂象見吉凶聖人象之而結之曰定之以吉凶所
以斷也獨河出圖洛出書聖人則之虱其間如贊
疣然石經無此十字真古本也論者乃曰石經有
闕文甚矣讀書者之不求甚解也此說善爲廬陵
解嘲余讀陸賈新語又得一證其明誠篇引易天

垂象見吉凶聖人則之天出善道聖人得之亦無
河出圖洛出書二句則漢初易師傳本無此語後
人所改也然攷史記孔子世家魯哀公十四年春
狩大野叔孫氏車子鉏商獲麟仲尼視之曰麟也
取之曰河不出圖雒不出書吾已矣夫史遷從孔
安國問此用古論語說今論語無雒不出書句何
晏集解引孔安國注亦不說雒書蓋魯論無此句
何晏又刪取孔注也此又可證河圖洛書之非誣
矣

重卦之說紛如聚訟王弼虞翻孔穎遠陸震陸德明
以爲伏羲鄭康成淳于俊以爲神農孫盛以爲夏
禹司馬遷揚雄皇甫謐以爲文王馬永卿元城語
錢先生好談易嘗問僕曰易更三聖何也僕曰漢
藝文志言宓戲氏始作八卦文王重易六爻作上
下篇孔氏爲之彖象繫辭文言序卦之屬十篇故
曰易更三聖先生曰以大傳言之神農爲耒耜蓋
坂諸益口中爲市蓋取諸噬嗑黃帝堯舜爲舟楫
蓋取諸渙服牛乘馬蓋取諸隨且益噬嗑渙隨皆

六十四卦之名也神農黃帝堯舜皆文王之前也
則重易六爻謂文王可乎且周官太卜掌三易一
曰連山二曰歸藏三曰周易爲經卦皆八其別皆
六十有四蓋夏曰連山商曰歸藏周曰周易此又
可見夏商之時已有六十四卦非至文王重易六
爻也然別揚雄班固之徒何以言文王重易爻蓋
文王拘於羑里而演六十四卦之辭如乾元亨利
貞坤元亨利牝馬之貞是也非重六爻也至於爻
辭則恐周公所作如乾初九潛龍勿用坤初六履

霜堅冰至是也若爻辭是文王作則不應曰主用亨于西山不應曰箕子之明夷故漢藝文志亦言文王作上下篇今卦辭上下二經也恐先儒傳習之誤也若夫彖象繫辭文言序卦之屬十篇班固以爲孔子所作由此言之則作易者不止三聖矣案淮南子伏戲爲之六十四變周室增以六爻然則伏羲旣畫八卦卽自重爲六十四卦淮南比諸儒最爲近古當得其實

後漢書范升傳引易天下之動貞夫一也今本一下

有者享粢升上書曰臣與博士梁恭山陽太守昌
羌俱修梁邱氏然則升所引易用梁邱本也

觀鳥獸之文與地之宜王昭素謂與地之間多有天
字案司馬貞史記補引此亦無天字王說非也

採木爲耒釋文本或作採木爲之耒耨非易窮則變
變則通通則久釋文一本作易窮則變通則久案
無變則通一句上下文義不屬亦非也

鹽鐵論本議篇大夫引易曰通其變使民不倦故工
不出則農用乖商不出則寶貨絕農不出則穀不

殖寶貨絕則財用匱故鹽鐵均輸所以通委則而
調緩急之不便又險固篇大夫曰故恤來兵仁傷
刑君子爲國必有不可犯之難引易曰重門擊柝
以待暴客言備之素修也漢書王莽傳下書曰予
之皇初祖考黃帝定天下將兵爲上將軍建華蓋
立斗獻內設大將外置大司馬五大將軍二十
五人偏將軍百二十五人裨將軍千二百五十人
校尉萬二千五百人司馬三萬七千五百人侯十
一萬二千五百人當百二十二萬五千人士吏四

十五萬人士千三百五十萬人應協於易弧矢之利以威天下此皆傳會易文所謂緣飾經術者也焦竑易筌十三卦獨乾坤合而不分上古衣裳相連乾坤相依君臣一體也後世衣裳離而爲二尊君卑臣上下判隔失古意遠矣今獠川苗寨多衣統袞上下相連猶是古法所謂禮失而求諸野也

剗木爲舟剗木爲楫釋文剗本又作剗淡本亦作剗然則剗淡是王弼正本作剗作剗者別本也

服牛乘馬說文引易作犧牛乘馬集韻備房六切音

伏用牛也案後漢書皇甫嵩傳義真備永平章懷太子注備古服字今河南人有此言

重門擊柝說文引易作擊櫓又引作擊櫛漢書王莽傳亦引作擊櫛案許用孟氏易莽時衡咸爲講學大夫傳梁邱易則作櫛者三家經本也作櫓者存異文爾周禮疏引鄭注云豫坤下震上九四體震又互體有艮艮爲日門震日所出亦爲門重門象艮又爲手巽爻也應在四皆木也手持二木也手持二木以相敲是爲擊柝擊柝爲守備警戒也四

又互體爲坎坎爲盜五離爻爲甲冑戈兵盜爲持
兵是暴客也又以其卦爲豫有守備則不可自逸
此之取象亦極密矣

漢書劉向傳引易古之葬者厚衣之以薪殮之中野
不封不樹後世聖人易之以棺槨棺槨之作自黃
帝始白虎通引易曰葬之草野所以絕孝子之思
慕也劉引脫喪期无數句白虎通作草野蓋三家
經本不同也禮記正義引易下邳甘容說諸侯在
千里內皆奔喪千里外不奔喪若同姓千里外猶

奔喪親親也此說喪期無數之義甘容無考佚說僅見此條

後漢書仲長統傳引易曰陽一君二臣君子之道也陰二君一臣小人之道也然則寡者爲人上者也衆者爲人下者也今易作陽一君而二民陰二君而一民統所述蓋三家經文

漢書律歷志尺者箋也丈者張也引者信也陸佃埤雅蠖之義蓋取諸尺蚓之義蓋取諸引箋于尺伸于引今人布指求尺一縮一伸如蠖之步謂之尺

蠖豈放是乎

說苑引易曰不威小不懲大此小人之福也漢書谷永傳引易曰危者有其安者也亡者保其存者也皆與今易殊異

白虎通引易曰天地氤氳萬物化淳男女構精萬物化生情性之大莫若男女男女之交人倫之始莫若夫婦人承天地施陰陽故設嫁娶之禮者重人倫廣繼嗣也

雜而不越說文引易作遞訓踰也越遞亦古今字

雲峯胡氏說履德之基章云此章三陳九德雖夫子偶卽九卦言之然上經自乾至履九卦下經自恒至損益亦九卦上經履至謙五卦下經益至困井亦五卦上經謙至復又九卦下經井至巽又九卦上經自復而咸八卦而爲下經之恒下經自巽而未濟八卦復爲上經之乾上下經對待又似非偶然者或於此可見文王之心焉對待凡十卦置乾不言乾爲君也文王常存事君之小心而不知其有君民之大德者也九卦上下體無離文王晦其

明者也然有互體離在焉實未嘗不明也

焦竑易筌因之辨辨於已復之辨辨於物井則人已之間兩極其辨也

魏了翁周易要義六畫六爻六位六虛四者相近而不同爻者動也專指六六則父母之策也畫者卦也兼七八九六則包男女之策也總而言之畫卽爲爻析而言之爻與畫異畫之見者又爲位爻之變者又爲虛故曰變動不居周流六虛位從爻而爲虛也曰六畫成卦六位成章虛從畫而爲位也

然其實皆自奇偶之畫始

漢書蓋寬饒傳引韓詩易傳曰五帝官天下三王家天下家以傳子官以傳賢若四時之運功成者去不得其人則不居其位此不知於易何屬玩其語義似苟非其人道不虛行傳文也

繫辭傳若夫雜物撰德辨是與非則非其中爻不備此兼正體互體言也參伍以變謂三爻與五爻交五成象也京房以半互爲約象取互體亦太密鍾會作易無互體論與牛清談濫觴於此苟顚論之

是也張瑜易卦補逸易以初上二爻爲定體以中四爻爲變繫辭謂之中爻先儒謂之互體所謂雜物撰德辨是與非互成剛柔相易之道非此無見焉王應麟取之又李石方舟先生互體例自序易者以天地五行而生數由數而生卦因三而成六正悔內外以數遍於天地五行而八卦相資爲用以三而五而五行互體以六而八而八卦互體若無互體則易之變化內外上下不相應數有所窮數窮則生成之理幾乎熄矣說亦明切

郭京舉正二多譽四多懼注云近也今本誤以近也
字爲正文而注中又脫懼字案王注四之多懼以
近君也正解經中近也何得妄生異議

物相雜故曰文文不當故吉凶生焉干寶注其辭爲
文也動作云爲必考其事令與爻義相稱也事不
稱義雖有吉凶而非今日之吉凶也故元亨利貞
穆姜以死黃裳元吉南蒯以敗是所謂文不當也
故於經則有君子吉小人否於占則王相之氣君
子以遷官小人以遇罪也

謂書疑甲編八卦以乾爲主六子以震爲主懼以終始其要无咎聖人之情盡於此矣震卽懼也翰案震无妄者存乎悔顯言震可証

能說諸心能研諸侯之慮王弼注諸侯主有爲者也能說萬物之心能精爲者之務正義謂諸侯以此易之道思慮諸物轉益精粹李衡易學能研諸侯之慮衍侯之二字本義從之

人謀鬼謀百姓與能李氏集解引朱仰之曰人謀謀及卿士鬼謀謀及卜筮也又謀及庶民故曰百姓

與能朱仰之不知何人苟爽九家集解有朱氏疑
卽朱仰之也儀禮疏引鄭注鬼謀謂謀卜筮於廟
門與朱義合

馮椅厚齋易學改繫辭上下爲說卦上下以隋經籍
志有說卦三篇云董真卿周易會通案朱子謂彖
傳釋象辭象傳釋爻辭繫辭傳則通釋說爻之辭
乃統名繫辭傳恐不可改繫辭傳爲說卦蓋說卦
之體乃分別八卦方位與其象類故得以說卦名
之繫辭兩篇釋卦爻之義例辭意爲多恐不得名

之說卦也此足以見馮氏之非

張應珍義山周易注參天兩地而倚數本義天圓地方圓者一而圓三三各一奇方者二而圓四四合二偶似費擬議蓋五生數之中天一三五凡參地數二四凡兩故聖人參兩之以倚數八卦之象乾坤天地以大虛言之也震巽天地之長男女爲雷風有氣無形坎離天地之中男女爲水火有形無質良兌天地之少男女爲山澤有質確定矣義山注今佚此條載吉安府志

漢書律歷志三統者天施地化人事之紀也十一月乾之初九陽氣伏於地下始著爲一萬物萌動鐘於太陰故黃鐘爲天統律長九寸九者所以究極中和爲萬物之元也易曰立天之道曰陰與陽六月坤之初六陰氣受於太陽繼養化柔萬物生長歛之於未令種剛彊大故林鐘爲地統律長六十六者所以含陽之施歛之於六合之內含剛柔有體也立地之道曰柔與剛乾之太始坤作成物正月乾之九三萬物棣通族出於寅人奉而成之仁

以養之義以行之令事物各得其理寅木也爲仁
其聲商也爲義故太簇爲人統律長八寸象八卦
宓戲氏之所以順天地通神明類萬物之情也立
人之道曰仁與義案此亦孟京遺法馬季常以三
極爲三統王肅以陰陽剛柔仁義爲三極皆本於
此

安磐易闕天下之事數往者順知來者逆易爲知來
而作故其數逆數也往者順蓋因下句而並舉之
非爲易有數往之順數也楊慎丹鉛錄載此條

梁寅周易參義神卽帝也帝者神之體神者帝之用
故主宰萬物者帝也所以妙萬物者帝之神也吾
友陳孝廉超就正嗣神也者妙萬物而爲言者也
惠氏棟謂妙當從王肅作眇引陸士衡文賦眇衆
慮而爲言爲證其說固當至以妙字爲近老莊語
則非案說文妙字作眇急仄也从弦省少聲與老
莊所言亦不合是周易及老莊中妙字皆當作眇
經傳中眇之訛爲妙猶諱之訛爲訊與至宋儒真
精妙合之說則眞揚老莊之波矣

雷以動之八句以雷風雨日艮兌乾坤爲序終之以
坤蓋歸藏易也帝出乎震節以震巽離坤兌乾坎
艮爲序終之以艮蓋連山易也

漢書五行志於易乾爲君爲馬馬任用而無力君氣
毀故有馬嘅又云坤爲牛牛大心而不能思慮心
氣毀故有牛嘅又云於易巽爲雞雞有冠距文武
之貌不爲威儀貌氣毀故有雞嘅又云於易坎爲
豕豕大耳而不聰察聽氣毀故有豕嘅也又云離
爲火爲目羊上角下蹠剛而包柔羊大目而不精

明視氣毀故有羊蹶又云於易兌爲口羊木爲金所病故致羊蹶又云於易兌爲口犬以吠守而不可信言氣毀故有犬蹶此亦本說卦爲言而羊則屬離兌二卦狗屬兌卦於易不甚合

陳圖南云八卦本對八體獨闕其鼻且以巽言股股卽係足也若殷可言則又遺其股與羲皇不相應也傳曰鼻起而止山也曰風能鼓舞萬物而手之所以舞也蓋乾爲首坤爲腹天地定位也坎爲耳離爲目水火相逮也艮爲鼻兌爲口山澤通氣也

巽爲手震爲足雷風相薄也此義皇八卦之應其
理昭昭矣案荀九家有艮爲鼻爲鼻爲虎爲狐漳州陳
安卿說麻衣易以艮爲鼻朱子云鼻者面之山魏
管輅已如此說愚以爲八卦佚象有艮爲鼻是艮
爲手之外又爲鼻也據以爲說則可據以徑改經
文則不可

丹鉛錄明堂位商之大白周之大赤皆旂名左傳分
康叔以少帛旂以大赤注云大赤通帛周禮象路
建大赤以朝木路建大麾以田要之乾取象大赤

亦取其色耳翰案朱震易叢說雖萃路史注並引歸藏易云乾爲天爲君爲父爲大赤爲辟爲卿爲馬爲禾爲血卦然則說卦之文其亦述而不作乎震爲專釋文干云花之通鋪爲花貌謂之敷本又作專如字虞同姚云專一也鄭市戀反案李鼎祚集解本作專用虞翻本也注云陽在初隱靜未出觸坤故專卽乾靜也專

鄭康成說爲大塗云國中三塗震上值房心塗而大者取房有三塗焉見漢上易傳說經路云田間之

道曰徑路艮爲之者取山間兔鹿之蹊見錦繡萬
花谷後集王廩說爲大塗云萬物所出說徑路云
物始故爲徑路並見太平御覽漢人遺象晉人遺
理皆堪玩味

其於稼也爲反生朱衷云謂枲豆之類戴甲而生也
一說諸穀其始必根於土繼爲穀實必又反而生
於土爲反義甚纖巧

其於人也爲寡髮釋文寡本又作宜黑白雜爲宜李
氏解集引虞翻曰爲白故宜髮馬君以宜爲寡髮

非也周禮考工記車人之事半矩謂之宣鄭注頭
髮皓落爲宣引易巽爲宣髮賈公彥疏引鄭注易
宣髮取四月靡草死髮在人體猶靡草在地今易
文不作宣作寡者蓋宣寡義得兩通故鄭爲宣不
作寡也案鄭注易從馬季長義注禮云皓落爲宣
則兼用白義故疏謂兩通也王志堅表吳錄宣髮
白髮也考工記注云頭髮皓落爲宣亦可言蒜髮
本草蔓菁子歷油塗頭能變蒜髮翰案此出孟說
食療本草蓋古說有以蒜訓宣者故益據用之也

楊用修云坎中一畫卽心體故八卦惟習坎有孚離
心亨心腎皆屬坎水水火未嘗離也坎爲心離亦
爲心坎中實心之體離中虛心之用宋儒所謂有
主則實無主則虛也焦弱侯云坎離者乾坤之精
氣乾爲首坎爲下首坤爲腹離爲大腹離非能大
於坤也大腹下首故疾證也

兌爲羊項氏玩辭引鄭注羊女使漢上易傳引鄭本
作陽此陽謂養无家女行貨炊爨今時有之賤於
妾也案爾雅釋詁台朕賚界卜陽予也郭璞注曾

詩云陽如之何今巴濮之人自呼阿陽卽此集解
羊作羔引虞翻曰羔女使文雖殊而與鄭義協
釋文引荀爽九家易兌後有二爲常爲輔類注云常
西方神也吳澄纂言或曰常九旗之二下二奇象
通帛下垂上一偶象分繫於杜說亦有理然九家
義古當必有據攷太平御覽卷三百六十一引紀
聞載白澤圖云無首似孩子跳躍不見手其名曰
常呼其名三則滅西方之神殆卽是乎

荀爽九家易有八卦逸象三十有一陸德明釋文載

之朱子採入本義又李鼎祚集解引虞翻注八卦
遯象甚多仲翔傳孟喜之易藍古法也惠氏棟輯
入易漢學而尙有疎漏茲更補輯以類相從統記
於此

乾爲王爲大君爲神爲人爲聖人爲賢人爲君子爲
善人爲武人爲行人爲寵人爲高宗爲物爲敬爲
威爲嚴爲道爲天道爲德爲賢德爲盛德爲舊德
爲性爲信爲善爲仁爲良爲忿爲怨爲生爲慶爲祥爲
嘉爲福爲祿爲積善爲揚善爲介福爲天休爲先

爲始爲知爲大爲盈爲肥爲好爲施爲利爲清爲治爲高爲宗爲族爲甲爲老爲舊爲古爲久爲畏爲動直爲易爲立爲堅剛爲茂爲大明爲晝爲遠爲郊爲野爲門爲淵爲大謀爲道門爲百爲歲爲朱爲頂爲圭爲著爲衣爲龍爲言爲精爲外爲頽乾_{十有五}逸象入坤爲妣爲臣爲民爲衆臣爲萬民爲姓爲刑人爲小人爲邑人爲鬼爲戶爲形爲自爲我爲自我爲躬爲身爲至爲安爲康爲富爲財爲理爲度爲積爲積土爲聚爲重爲厚爲基爲致爲用

爲包爲藏爲寡爲徐爲營爲下爲裕爲虛爲空虛
爲內爲廣爲晝爲永爲邇爲近爲思爲默爲惡爲
禮爲義爲事爲作事爲類爲閒爲密爲恥爲欲爲
過爲醜爲惡爲過惡爲不善爲怨爲害爲終爲死
爲喪爲殺爲亂爲弑父爲迷暗爲喪期爲積惡爲
蔽爲冥爲晦爲夜爲夕爲莫夜爲暑爲乙爲年爲
十年爲盍爲戶爲德門爲閭戶爲閑關爲庶政爲
業爲大業爲土爲田爲邑爲自邑爲國爲萬國爲
邦爲大邦爲異邦爲方爲鬼方爲器爲缶爲囊爲

裳爲輶爲虎爲兕爲黃牛

坤逸象一
百十二

震爲帝爲主

爲聖爲侯爲諸侯爲行人爲士爲兄爲夫爲元夫爲行爲中行爲道爲征爲出爲逐爲動起爲作爲興爲奔爲奔走爲驚走爲驚衛爲百里爲言爲講論爲議爲問爲語爲告爲聲爲響爲音爲鳴爲應爲鼓爲交爲懲爲反爲後爲後世爲從爲守爲左爲生爲緩爲寬仁爲常爲餘慶爲樂爲笑爲大笑爲喜笑爲笑言爲陵爲祭爲鬯爲東爲春爲禾稼爲草莽爲百穀爲麋鹿爲筐爲趾爲七

震逸象六
十有六

巽爲命爲有命爲誥爲號爲敎令爲商旅爲隨爲處爲婦爲妻爲處女爲入伏爲號眺爲餘殃爲歸爲利爲同爲濟爲舞爲交爲彊爲谷爲長木爲白茅爲草莽爲草木爲桑爲楊爲杞爲蘭爲苞爲薪爲帛爲綺爲腰帶爲墉爲牀爲蛇爲魚爲鮒

巽逸象四

十坎爲雲爲元雲爲雨爲冬爲大川爲河爲北爲志爲謀爲心腹爲恩爲血爲泣血爲脊爲榮爲勸爲常爲積爲惕爲疑爲恤爲閑習爲逖爲悔爲涕洟爲疾病爲災爲災眚爲罪人爲寇爲罰爲憤爲

欲爲淫爲獄爲艱爲塞爲暴爲毒爲虛爲瀆爲孚
爲平爲則爲經爲法爲叢爲聚爲習爲美爲後爲
入爲納爲臂爲要爲膏爲陰夜爲三歲爲酒爲鬼
爲弧爲弓彈爲檠木爲穿木爲棘匕爲蒺藜爲車
爲馬坎遯象六十九離爲黃爲見爲飛爲夏爲明爲文
明爲光爲大光爲占爲麗爲爵爲婦爲女子爲孕
爲戎爲甲爲刀爲斧爲資斧爲矢爲黃矢爲罔爲
罟爲惡人爲折首爲鵠爲準爲鳥爲飛鳥爲彌爲
瓶離遯象三艮爲弟爲子爲男爲君子爲小子爲

童蒙爲賢人爲僮僕爲狐爲狼爲豹爲碩爲碩果
爲慎爲順爲時爲對爲節爲官爲待爲執爲多爲
厚爲求爲篤實爲居體爲穴居爲山陵爲城爲宮
爲庭爲廬爲廄爲舍爲宗廟爲社稷爲星爲斗爲
沫爲肱爲背爲膚爲鼻爲尾爲皮艮逸象四
十有五 兌爲友爲朋爲妹爲妻爲女爲少爲刑爲刑人爲秋爲
西爲暗昧爲雨爲小爲密爲見爲右爲契爲少知
爲小木爲小狐兌逸象

李鼎祚以序卦傳分繫各卦之首程子從之蓋費直

以彖象繫辭文言解說上下經則序卦之附於經
自費氏始也

一
行易纂引孟喜序卦云陰陽養萬物必訟而成之
君臣養萬民亦必訟而成之說文解字引易曰地
可觀者莫可觀於木說文易用孟氏亦引孟喜序
卦也淮南子繆稱訓引易剝之不可遂盡也故受
之以復似九家道訓亦別有序卦晉楊乂有易卦
序論徐堅初學記引之云險而止險而動泉也動
靜皆蒙故曰山三書皆佚唯存此數條而已明人

有取上經三十卦下經三十四卦之序撰爲四言
詩以便記誦者言簡而義該何楷古周易訂詁取
之今錄於此上篇其辭云天地既分厥初生民世
道多屯利建侯君發蒙開治需乃化駟頑愚起訟
師貞以均威不如德比附是勤柔能勝剛小畜懿
文中正履帝民淳泰臻无平不陂傾否圓存何以
領之義在同人同人无我大有殷殷承之以謙和
豫熏熏能无訛隨幹蠱經綸敦臨容保大觀教神
弼梗剛克噬嗑令申哀矜勿喜敢責以文爻煩實

衰弱復相循禮復无妄畜德完醇大畜須養頭吉
以貞陽剛太過坎險沉淪明能脫險匪離則昏下
篇其辭云陰陽交媾夫婦造端咸感无心有恒別
嫌姦暴者竭退遯者完完斯大壯晉明離南進必
有傷明夷幽濟潛德正始家人自閑家睽則蹇夙
吉解艱何以解之懲窒改遷損益相仍夬決乃全
濟剛以柔巽女姤乾相遇則萃聚乃升參驟升擢
困井養寒泉辨義既精改革何難慎重若鼎器屬
震男動不可縱屹如艮山漸而不迫歸妹成懼居

豐思憂世道旅遷異入兌悅水流湊散情宜品節
中孚乃安小過必慎旣濟狂淵事難喻皮未濟終
焉

本義引晁氏云履而泰鄭本無而泰二字李氏集解
本嗑者合也嗑上有噬字致飾然後亨則盡矣然
作而不養則不可動可下有以字决必有所遇无
所字物不可以終動動下有動必二字李用虞翻
本蓋有所據若郭京舉正物生必蒙物作始蒙者
蒙也蒙下有昧字比者比也者下有親字王昭索

本於離者麗也增麗必有所感故受之以咸則皆以意爲之也

李逢期易經隨筆論雜傳大過以下卦不反對謂大過與頤一爲四陽在內二陰在外一爲四陰在內二陽在外與坎離中孚小過同皆兩卦對待而相反者其義則一顛一正亦相反也姤與夬漸與歸妹旣濟與未濟皆以一卦反復而成兩卦者其義則柔與剛與剛決柔反女之終與女之待反定與窮反蓋此八卦雖不反對而反對之義未嘗不存

若以爲錯簡則女之終男之窮又似交互之辭而
歸妹爲震兌合體之卦未濟爲離坎合體之卦亦
頗相反似非誤者要之聖人讀易至於韋編三絕
見得易道無窮分看合看橫看直看方看圓看序
看錯看莫不各有至理存焉聖人固覺其意味之
深長不以一定求之讀易者誠得其意亦不必妄
生議論也說甚明辨劉左青讀書疑雜卦前半篇
皆反對末節是互卦亦有見

蒙雜而著郭京舉正雜作稚以胞改經不如雜字義

深